

Broj: 01/1-___/1
Kakanj, ____. 01.2018. godine

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06, 51/09) i člana 24. Statuta Općine Kakanj („Službene novine Općine Kakanj“, broj: 4/08), a u vezi sa članom 33. Odluke o izvršavanju Budžeta Općine Kakanj za 2018. godinu, broj: 01/1-15-545/17 od 28.12.2017. godine („Službene novine Općine Kakanj“, broj: 01/18), Općinsko vijeće na __. sjednici, održanoj dana __.__.2018. godine, u s v o j i l o j e

P R O G R A M

UTROŠKA SREDSTAVA IZ BUDŽETA OPĆINE KAKANJ

ZA PODSTICAJ RAZVOJA PODUZETNIŠTVA I OBRTA ZA 2018. GODINU

1. Podaci o Programu

Program utroška sredstava iz Budžeta Općine Kakanj za podsticaj razvoja poduzetništva i obrta za 2018. godinu sa kriterijima raspodjele temelji se na odobrenim sredstvima za ovu namjenu u Budžetu Općine Kakanj za 2018. godinu sa pozicije „Subvencije podsticaju razvoja poduzetništva i obrta – sredstva naknade od dijela prihoda TE“ (u daljem tekstu: Program), a shodno Zakonu o izdvajanju i usmjeravanju dijela prihoda preduzeća ostvarenim radom termoelektrana (Službene novine FBiH, broj: 80/14).

2. Period realizacije Programa

Sredstva namijenjena za podsticaj razvoja poduzetništva i obrta na području općine Kakanj realizovaće se u periodu od 01.01. - 31.12.2018. godine.

3. Raspoloživi iznos sredstava

460.000,00 (četiristotinešezdesethiljada) KM.

4. Namjena Programa

- 4.1. Refundacija troškova osnivanja obrtničkih (osnovno zanimanje), trgovačkih i ugostiteljskih radnji i dijela troškova osnivanja preduzeća – d.o.o. u 2018. godini;
- 4.2. Projekat „Pokreni svoj posao u Kaknju“ – preduzeća – d.o.o., obrt i srodne djelatnosti (osim poljoprivredne), apoteke i biroi koji pružaju stručne usluge;
- 4.3. Sufinansiranje troškova obuke, dokvalifikacije i prekvalifikaciju za poslove zavarivača, krojača, bravara i drugih zanimanja shodno potrebama tržišta rada;
- 4.4. Regresiranje kamata po kreditima odobrenim u komercijalnim bankama u 2018. godini za poduzetnike i obrtnike sa područja općine Kakanj (osim za trgovine i ugostiteljstvo);

- 4.5. Sufinansiranje projekata u saradnji sa drugim institucijama, udruženjima i organizacijama - oblast poduzetništva i obrta;
- 4.6 Sufinansiranje samozapošljavanja i zapošljavanja osoba sa invaliditetom kroz:
 - I Refundaciju troškova obaveznih doprinosa i nabavke opreme;
 - II Refundaciju troškova zakupa poslovnog prostora;
- 4.7. Sufinansiranje projekta „Ekonomsko osnaživanje žena kroz obuku šivanja, tkanja, pletenja i dekupaž“;
- 4.8. Razvijanje poduzetničke svijesti kod učenika završnih razreda srednjih škola sa područja općine Kakanj;
- 4.9. Sufinansiranje dijela troškova zakupa poslovnog prostora obrtničkim radnjama (osnovno zanimanje) i preduzećima d.o.o., koji su registrovali djelatnost i osnovali firmu na području općine Kakanj u 2017. i 2018. godini;
- 4.10. Učešće na sajmovima i promocija poduzetništva i obrta;
- 4.11. Ugovorene obaveze prema korisnicima podsticajnih sredstava iz 2016.i 2017. godine;
- 4.12. Neisplaćeni podsticaji iz 2017. godine;
- 4.13. Rezervna sredstva.

5. Korisnici Programa

Obrtničke radnje u osnovnom zanimanju, trgovačke i ugostiteljske radnje i preduzeća – d.o.o., registrovana na području općine Kakanj, nezaposlene osobe sa područja općine Kakanj, lica sa invaliditetom, učenici srednjih škola sa područja općine Kakanj, Udruženje poslodavaca općine Kakanj „UPOK“ i Udruženje žena općine Kakanj „UŽOK“.

6. Izvor sredstava

Budžet Općine Kakanj za 2018. godinu, pozicija „Subvencije podsticaju razvoja poduzetništva i obrta - sredstva naknade od dijela prihoda TE“, ekonomski kod: 614500 („Službene novine Općine Kakanj“, broj: 01/18).

UVODNI DIO

Programom utroška sredstava iz Budžeta Općine Kakanj za podsticaj razvoja poduzetništva i obrta za 2018. godinu, Općina Kakanj nastoji:

- razviti poduzetničku svijest među mladim osobama,
- povećati broj i održivost obrtničkih radnji i preduzeća - d.o.o.,
- povećati broj zaposlenih na području općine Kakanj.

U skladu sa Zakonom o podsticaju razvoja male privrede („Službene novine Federacije BiH“ broj: 19/06) kojim se uređuje planiranje, osiguranje sredstava i provedba mjera razvoja male privrede u Federaciji BiH, omogućeno je da lokalne zajednice mogu u svojim Budžetima izdvojiti finansijaska sredstva za podsticaje. Na osnovu toga u Budžetu Općine Kakanj za 2018. godinu odobren je iznos od 460.000,00 KM za podsticaj razvoja poduzetništva i obrta.

I VRSTE I NAČIN OSTVARIVANJA PODSTICAJA

R/b	Naziv podsticaja	Planirana sredstva / KM
1.	Refundacija troškova osnivanja obrtničkih (osnovno zanimanje), trgovačkih i ugostiteljskih radnji i dijela troškova osnivanja preduzeća – d.o.o. u 2018. godini	40.000,00
2.	Projekat „Pokreni svoj posao u Kaknju“ – preduzeća – d.o.o., obrt i srodne djelatnosti (osim poljoprivredne), apoteke i biroi koji pružaju stručne usluge	120.000,00
3.	Sufinansiranje troškova obuke, dokvalifikacije i prekvalifikacije za poslove zavarivača, krojača, bravara i drugih zanimanja shodno potrebama tržišta rada	120.000,00
4.	Regresiranje kamata po kreditima odobrenim u komercijalnim bankama u 2018. godini za poduzetnike i obrtnike sa područja općine Kakanj (osim za trgovine i ugostiteljstvo)	20.000,00
5.	Sufinansiranje projekata u saradnji sa drugim institucijama i udruženjima, humanitarnim i nevladinim orgaizacijama - oblast poduzetništva i obrta	35.000,00
6.	Sufinansiranje samozapošljavanja i zapošljavanje osoba sa invaliditetom kroz: I Refundaciju troškova obaveznih doprinosa i nabavke opreme; II Refundaciju troškova zakupa poslovnog prostora;	20.000,00
7.	Sufinansiranje projekta „Ekonomsko osnaživanje žena kroz obuku šivanja, tkanja, pletenja i dekupaž“	15.000,00
8.	Razvijanje poduzetničke svijesti kod učenika završnih razreda srednjih škola sa područja općine Kakanj	10.000,00
9.	Sufinansiranje dijela troškova zakupa poslovnog prostora obrtničkim radnjama (osnovno zanimanje) i preduzećima d.o.o., koji su registrovali djelatnost i osnovali firmu na području općine Kakanj u 2017. i 2018. godini	10.000,00
10.	Učešće na sajmovima i promocija poduzetništva i obrta	15.000,00
11.	Ugovorene obaveze prema korisnicima podsticajnih sredstava iz 2016. i 2017. godine	30.000,00
12.	Neisplaćeni podsticaji iz 2017. godine	6.010,00
13.	Rezervna sredstva	18.990,00
UKUPNO		460.000,00

Refundacija troškova osnivanja obrtničkih (osnovno zanimanje), trgovačkih i ugostiteljskih radnji i dijela troškova osnivanja preduzeća – d.o.o.

Na ovaj način refundiraju se troškovi osnivanja obrtničkih (osnovno zanimanje), trgovačkih i ugostiteljskih radnji i dio troškova osnivanja preduzeća – d.o.o. u periodu od 15.12.2017. – 14.12.2018. godine. Kroz ovaj podsticaj nastoji se povećati broj i održivost preduzeća/obrta na području općine Kakanj, doprinijeti razvoju poduzetničke svijesti, te povećati broj zaposlenih na području naše općine.

Pravo na podsticaj imaju fizička i pravna lica koja registruju djelatnost i osnuju firmu kao obrtničku u osnovnom zanimanju, trgovačku ili ugostiteljsku radnju ili kao društvo sa ograničenom odgovornošću – d.o.o. na području općine Kakanj u periodu od 15.12.2017. – 14.12. 2018. godine. Za ostvarivanje podsticaja potrebno je uz zahtjev dostaviti i sljedeću dokumentaciju (originali ili ovjerene kopije):

- rješenje o registraciji društva sa ograničenom odgovornošću – d.o.o. (Općinski sud u Zenici), odnosno rješenje o registraciji obrtničke, trgovačke ili ugostiteljske radnje (Služba za privredu, urbanizam i zaštitu okoline Općine Kakanj), izdato u periodu 15.12.2017.-14.12.2018. godine;
- obavještenje o razvrstavanju djelatnosti prema Klasifikaciji djelatnosti (izdato od strane Federalnog zavoda za statistiku-Kantonalni ured Zenica);
- dokazi o plaćenim taksama i troškovima u vezi registracije djelatnosti odnosno osnivanja firme (uplatnice, računi i dr.)

Refundacija troškova osnivanja firme ne odnosi se na osnivački kapital, već na troškove notarske obrade dokumenata, sudske i administrativne takse, te izradu pečata firme.

Zahtjevi za refundaciju predmetnih troškova sa potrebnom dokumentacijom podnose se Službi za privredu, urbanizam i zaštitu okoline putem prijemne kancelarije Općine Kakanj do 14.12.2018. godine.

Refundacija troškova osnivanja trgovačkih i ugostiteljskih radnji može biti ostvarena jednom u toku 2018. godine za jedan poslovni prostor.

Projekat – „Pokreni svoj posao u Kakanju“

Ovim podsticajem predviđeno je sufinansiranje pokretanja i održavanje malih biznisa – preduzeća – d.o.o., obrt-a i srodnih djelatnosti (osim poljoprivrede), apoteke i biroi koji pružaju stručne usluge, za nezaposlene osobe sa područja općine Kakanj, koje se nalaze na evidenciji Biroa za zapošljavanje, a planiraju registrovati djelatnost, te za fizička/pravna lica koja su registrovala djelatnost u 2018. godini.

Podsticajna sredstva namijenjena su za:

- refundaciju troškova obaveznih doprinosa – PIO, zdravstveno osiguranje i osiguranje od nezaposlenosti, za registrovanu djelatnost - period od 24 mjeseca (prva godina u iznosu od 100%, a maksimalno 350,00 KM/mjesec, druga godina 50%, a maksimalno 175 KM/mjesec);

- sufinansiranje troškova pokretanja registrovane djelatnosti (nabavka mašina, opreme i repromaterijala neophodnog za registrovanu djelatnost) u iznosu do 3.000,00 KM,

Projekat obuhvaća sljedeće aktivnosti:

- objavljivanje Javnog poziva;
- apliciranje zainteresiranih kandidata;
- razmatranje i obrada pristiglih prijava (odabir);
- registracija djelatnosti (lica koja nisu registrovala djelatnost);
- potpisivanje Ugovora o realizaciji Projekta sa odabranim korisnicima;
- isplata odobrenog iznosa sredstava za sufinansiranje troškova pokretanja i održavanja vlastitog biznisa;
- monitoring.

Za ostvarivanje predmetnih podsticaja kandidati su uz prijavu na Javni poziv dužni dostaviti sljedeću dokumentaciju:

- uvjerenje da se lice nalazi na evidenciji Biroa za zapošljavanje Općine Kakanj/rješenje o registraciji djelatnosti (društva sa ograničenom odgovornošću – d.o.o.);
- biznis plan (obrazac je dostupan u Službi za privredu, urbanizam i zaštitu okoline i web stranici Općine Kakanj – www.kakanj.gov.ba)
- ovjerenu izjavu da će nakon odobravanja podsticajnih sredstava, registrovanu djelatnost održavati u trajanju od najmanje 24 mjeseca od dana potpisivanja ugovora o realizaciji projekta „Pokreni svoj posao u Kaknju“.

Javni poziv za podnošenje zahtjeva za ovu vrstu podsticaja će biti otvoren do utroška raspoloživih sredstava, a najduže do 30.11.2018. godine.

Komisija će mjesečno obavljati intervjue sa prijavljenim kandidatima i ocijeniti/odabrati iste. Odabrani kandidati će nakon što registruju djelatnost (za lica koja nisu registrovana) potpisati ugovor sa Općinom.

Nakon potpisivanja ugovora o realizaciji Projekta, dostavljanja predračuna za nabavku sredstava i ovjerene izjave da će podsticajna sredstva namjenski utrošiti, Općina će na račun korisnika podsticaja uplatiti odobreni iznos za nabavku sredstava za rad, dok će korisnik sredstava biti obavezan u roku od mjesec dana od dana isplate u Službu za privredu, urbanizam i zaštitu okoline dostaviti račun (faktura uz fiskalni račun). Troškovi obaveznih doprinosa će se uplaćivati mjesečno.

Sufinansiranje troškova obuke, dokvalifikacije i prekvalifikacije za poslove zavarivača, krojača, bravara i drugih zanimanja shodno potrebama tržišta rada

Ovom vrstom podsticaja omogućava se nezaposlenim osobama sa završenom srednjom školom, koje se nalaze na evidenciji Biroa za zapošljavanje, starosne dobi do 35 godina, priprema za rad kroz obuku, dokvalifikaciju i prekvalifikacije, u namjenski opremljenim prostorijama, a radi jačanja konkurentnosti na tržištu rada, povećanja kompetencija i šansi za zapošljavanje.

Korisnici podsticaja su poslovni subjekti registrovani na području općine Kakanj koji redovno izmiruju obaveze po osnovu poreza i doprinosa i imaju potrebu za zapošljavanjem novih radnika

uslijed pokretanja nove proizvodnje, povećanja obima postojećih poslovnih aktivnosti, uvođenja tehnoloških i organizacionih promjena.

Općina će poslovnim subjektima sufinansirati troškove obuke, dokvalifikacije i prekvalifikacije nezaposlenih osoba u maksimalnom iznosu do 1.500,00 KM po kandidatu.

Plaćanje troškova obuke, dokvalifikacije i prekvalifikacije Općina će vršiti poslovnom subjektu nakon okončanja iste i dostavljanja dokaza da su polaznici okončali obuku, dokvalifikaciju i prekvalifikaciju (kopija certifikata, uvjerenja ili potvrde), te zahtjeva/fakture o utrošku sredstva.

Podsticajna sredstva koja se poslovnom subjektu odobre po ovom Projektu mogu se utrošiti na sljedeće:

1. Teoretsku nastavu u trajanju do 20 radnih sati,
2. Praktičnu nastavu u trajanju do 120 radnih sati;
3. Odijelo i obuču za osobe na obuci;
4. Repromaterijal;
5. Naknadu za topli obrok-ishranu, penzijsko i invalidsko osiguranje;
6. Troškove certifikacije, izdavanje uvjerenja ili potvrda.

Obuku, dokvalifikaciju i prekvalifikaciju kandidata će vršiti certificirani majstori zaposleni kod poslovnih subjekata koji iskazuju interes za učešće u ovom Projektu.

Za ostvarivanje podsticaja potrebno je dostaviti sljedeću dokumentaciju (originali ili ovjerene kopije):

- prijavni obrazac za sufinansiranje troškova obuke, dokvalifikacije i prekvalifikacije za poslove zavarivača krojača, bravara i drugih zanimanja shodno potrebama tržišta rada koji se može preuzeti u Službi za privredu, urbanizam i zaštitu okoline i web stranici Općine Kakanj – www.kakanj.gov.ba);
- rješenje o registraciji djelatnosti;
- obavještenje o razvrstavanju djelatnosti prema Klasifikaciji djelatnosti;
- uvjerenje Uprave za indirektno oporezivanje (ukoliko su PDV obveznici);
- broj tekućeg računa kod poslovne banke.

Općina će sa odabranim poslovnim subjektima zaključiti ugovore kojim će biti regulisana međusobna prava i obaveze.

Javni poziv za podnošenje zahtjeva za ovu vrstu podsticaja će biti otvoren do utroška raspoloživih sredstva, a najduže do 30.11.2018. godine.

Regresiranje kamata po kreditima odobrenim u komercijalnim bankama u 2018. godini za poduzetnike i obrtnike sa područja općine Kakanj (osim za trgovine i ugostiteljstvo)

Na ovaj način se regresiraju kamate po kreditima odobrenim u komercijalnim bankama u 2017. i 2018. godini za poduzetnike i obrtnike sa područja općine Kakanj (osim za trgovine i

ugostiteljstvo), i to isključivo za kredite korištene radi ulaganja u registrovanu djelatnost korisnika kredita.

Ovom vrstom podsticaja Općina Kakanj će regresirati uplaćene kamate po kreditima odobrenim u komercijalnim bankama. Za kredite od 5.000,00 KM – 50.000,00 KM Općina će refundirati kamate u iznosu 100%, a za kredite od 50.000,00 KM – 100.000,00 KM u iznosu 50% od ukupno uplaćenih kamata. Kamata se regresira na godišnjem nivou. Maksimalna nominalna kamatna stopa koja se regresira iznosi do 8%, a period otplate kredita je do 5 godina. Općina Kakanj se obavezuje da će korisniku podsticaja refundirati kamate za cijeli otplatni period, pojedinačno za svaku godinu na kraju kalendarske godine, po dostavljanju potvrde od banke o uplaćenim kamatama.

Za ostvarivanje predmetnih podsticaja potrebno je uz aplikaciju na Javni poziv dostaviti i sljedeću dokumentaciju (originali ili ovjerene kopije):

- rješenje o registraciji društva ili obrtničke radnje za postojeća - registrovana pravna i fizička lica;
- obavještenje o razvrstavanju pravnog lica prema klasifikaciji djelatnosti;
- uvjerenje da lice nema obaveza po osnovu poreza;
- ugovor s bankom sa anuitetnim planom otplate kredita ;
- potvrdu banke o redovnoj otplati kredita, sa obaveznim pregledom obračunatih i uplaćenih kamata za period za koji se regresira kamata;
- dokaz o utrošku kreditnih sredstava (kao dokaz se prihvata: račun, faktura, ugovor).

Zahtjevi za regresiranje kamata po kreditima odobrenim u komercijalnim bankama u 2018. godini sa potrebnom dokumentacijom podnose se Službi za privredu, urbanizam i zaštitu okoline na prijemnoj kancelariji Općine Kakanj, najkasnije do 14.12.2018. godine.

Sa ove pozicije će se refundirati i kamate poduzetnicima i obrtnicima sa područja općine Kakanj po kreditima odobrenim u komercijalnim bankama u 2017. godini, a koji su ostvarili pravo na ovaj podsticaj, shodno Programu utroška sredstava iz Budžeta Općine Kakanj za podsticaj razvoja poduzetništva i obrta za 2018. godinu.

Sufinansiranje samozapošljavanja i zapošljavanja osoba za invaliditetom

Obzirom da se na području općine Kakanj pojavio određeni broj osoba sa invaliditetom koji su pokrenuli ili imaju namjeru pokrenuti vlastit biznis, te da je određeni broj osoba sa invaliditetom uposlen u firmama van područja općine Kakanj a koji bi svoje poslove mogli obavljati i na području naše općine čime bi se izbjegli problemi prevoza odlaska i dolaska na posao, kroz ovaj projekat predviđena su:

I Podsticajna sredstva za samozapošljavanje osoba za invaliditetom koji pokrenu ili su u 2017. godini pokrenuli vlastiti biznis i registrovali djelatnost namijenjena su za:

- sufinansiranje nabavke mašina, opreme i repromaterijala neophodnog za registrovanu djelatnost u maksimalnom iznosu do 3.000,00 KM;
- refundaciju troškova obaveznih doprinosa za registrovanu djelatnost za period od 24 mjeseca.

II Finansiranje zakupa poslovnog prostora firmama koje na području općine Kakanj formiraju organizacione jedinice u kojima će se upošljavati osobe sa invaliditetom preko 50% invaliditeta sa područja općine Kakanj. Maksimalan iznos poticajnih sredstava je 320,00KM/mjesečno za jednog pravnog subjekta.

Podsticaj će se realizovati tokom godine do utroška sredstava.

Jedan aplikant može ostvariti pravo na dodjelu posticajnih sredstva ili iz tačke I. ili tačke II. ove pozicije.

Sufinansiranje projekata u saradnji sa drugim institucijama, udruženjima i organizacijama – oblast poduzetništva i obrta

Podsticajna sredstva namijenjena su za sufinansiranje projekata u saradnji sa drugim institucijama, udruženjima i organizacijama – oblast poduzetništva i obrta za koje se tokom godine ukaže potreba, a koji imaju za cilj uspostavu povoljnijeg poslovnog okruženja, održivi ekonomski razvoj, modernizaciju poduzetništva i poljoprivrede i sl..

Sufinansiranje projekta „Ekonomsko osnaživanje žena kroz obuku šivanja, tkanja, pletenja i dekupaž“

Projekat ekonomskog osnaživanja žena će se realizovati u saradnji sa Udruženjem žena općine Kakanj „UŽOK“ kroz obuku šivanja, tkanja, pletenja i dekupaž, a za isti će se angažovati kvalifikovani predavači za ovu oblast.

Podsticajna sredstva namijenjena su za obuku 50 žena sa područja općine Kakanj, nabavku opreme i repromaterijala, te plaćanje troškova predavača/edukatora.

Projekat obuhvata 4 faze:

- Obuku šivanja i krojenja,
- Obuku tkanja na tkalačkom stanu,
- Obuku ručnog i mašinskog pletenja,
- Dekupaž.

Na ovaj način Općina Kakanj nastoji pomoći nezaposlenim ženama sa područja općine Kakanj da pronađu način i povećaju sopstvene šanse za zapošljavanje i tako sebi osiguraju ekonomsku neovisnost.

Realizacija Projekta je planirana tokom godine u trajanju od 4 mjeseca.

Po okončanju obuke UŽOK će Općini Kakanj dostaviti izvještaj o utrošku sredstava.

Razvijanje poduzetničke svijesti kod učenika završnih razreda srednjih škola sa područja općine Kakanj

Cilj ovog projekta je razviti poduzetničku svijest kod srednjoškolaca sa područja općine Kakanj, te im omogućiti da steknu određena znanja, vještina i sposobnosti potrebne za razvijanje

poduzetničkih ideja. Na ovaj način nastoji se istaći i važnost učenju poduzetništva kao obrazovne kompetencije.

Projekat će se realizovati u saradnji sa srednjim školama sa područja općine Kakanj i cetrificiranim edukatorima za predmetnu oblast. Pored razvijanja osobina potrebnih za razvijanje poduzetničkih ideja tokom edukacije, učenici će se upoznati i sa postupkom registracije djelatnosti, mogućnošću korištenja podsticajnih programa podrške za registrovanu djelatnost tj. o svemu onom šta znači biti poduzetnik. Nakon završene edukacije zainteresovani učesnici će imati zadatak da izrade poslovni plan iz oblasti za koju tokom edukacije iskažu interes. Najkvalitetniji poslovni planovi, a koje će odabrati Komisija imenovana rješenjem Općinskog načelnika, će biti novčano nagrađeni.

Podsticajna sredstva za ove pozicije namijenjena su za:

- Troškove edukatora;
- Nabavku repromaterijala;
- Izradu uvjerenja sa učesnike edukacije;
- Vaučere-nagrada za učenike čiji poslovni planovi budu najkvaliteniji,
- Posjeta firmama,
- Ostali troškovi (sala za edukaciju, osvježenje, i sl.).

Projekat će biti realizovan tokom godine.

Sufinansiranje dijela troškova zakupa poslovnog prostora obrtničkim radnjama (osnovno zanimanje) i preduzećima d.o.o., koji su registrovali djelatnost i osnovali firmu na području općine Kakanj u 2017. i 2018. godini

Na ovaj način refundira se dio godišnjih troškova zakupa poslovnog prostora fizičkim i pravnim licima koji su registrovali djelatnost kao obrt ili preduzeće – d.o.o. na području općine Kakanj u 2017. i 2018. godini, a svoje poslovne aktivnosti obavljaju u prostorijama na osnovu Ugovora o zakupu.

Općina Kakanj će sufinansirati 50% ukupnog iznosa zakupnine za 2018. godinu, s tim da je maksimalan iznos sufinansiranja zakupnine 1.200,00 KM.

Za ostvarivanje podsticaja potrebno je uz zahtjev dostaviti i sljedeću dokumentaciju (originali ili ovjerene kopije):

- rješenje o registraciji djelatnosti;
- uvjerenje Uprave za indirektno oporezivanje – ukoliko su PDV obveznici;
- ugovor o zakupu poslovnog prostora;
- rješenje Porezne uprave o obavezi plaćanja poreza po osnovu Ugovora o zakupu;
- dokaz o plaćenju zakupnine i porezu.

Zahtjevi za sufinansiranje predmetnih troškova sa potrebnom dokumentacijom podnose se Službi za privredu, urbanizam i zaštitu okoline na prijemnoj kancelariji Općine Kakanj najkasnije do 10.12.2018. godine.

Učešće na sajmovima, promocija poduzetništva i obrta

Iz navedenih sredstava planiraju se financirati sljedeći izdaci:

- sajmovi, promocija poduzetnika i obrtnika, medijsko predstavljanje, obavještanje o podsticajima, izrada brošura i afiša i dr.

Ugovorene obaveze prema korisnicima podsticajnih sredstava iz 2016. i 2017. godine

Shodno potpisanim ugovorima o realizaciji projekta „Pokreni svoj posao u Kaknju“ obaveza Općine je da korisnicima podsticajnih sredstava pored sufinansiranja nabavke sredstava za rad, repromaterijala, opreme i sl., za registrovanu djelatnost, refundira i troškove obaveznih doprinosa za period od 12 mjeseci. Također, za projekat „Sufinansiranje troškova obuke, stručnog osposobljavanja i usavršavanja radnika u skladu sa potrebama poduzetnika i obrtnika sa područja općine Kakanj“ obaveza Općine je sufinansiranje bruto plaće zaposlenika sa kojima su korisnici sredstava zaključili ugovore za period od 6 mjeseci.

Za navedene aktivnosti u 2016. i 2017. godini ostalo je neisplaćeno 30.000,00 KM i biće isplaćeno u tekućoj godini.

Rezervna sredstva

Sredstva za hitne i nepredviđene aktivnosti u oblasti poduzetništva i obrta koje se pojave tokom budžetske godine, u skladu sa utvrđenim kriterijima ovog Programa.

Realizacija – do kraja decembra tekuće godine.

Neisplaćeni podsticaji iz 2017. godine

U 2017. godini za razvoj poduzetništva i obrta neisplaćeni su podsticaji u iznosu od 6.010,00 KM, te će isti biti isplaćeni iz Programa za 2018. godinu.

Napomena: Jedan aplikant može ostvariti pravo na podsticaj maksimalno za 2 pozicije. Prednost pri odabiru korisnika općinskih podsticajnih sredstava imaju oni podnosioci zahtjeva koji prethodnih godina nisu bili korisnici istog.

II ZAVRŠNI DIO

Isplata podsticajnih sredstava će se obaviti na transakcijski račun korisnika istih, a otvoren kod poslovnih banaka.

U slučaju da planirani iznos sredstava za određenu vrstu podsticaja iz objektivnih razloga u cjelosti

ili djelimično ne bude utrošen, Služba za privredu, urbanizam i zaštitu okoline Općine Kakanj može uz saglasnost Općinskog načelnika navedena neutrošena sredstva usmjeriti na realizaciju drugih podsticaja iz ovog Programa.

Služba za privredu, urbanizam i zaštitu okoline Općine Kakanj će na kraju budžetske godine sačiniti Izvještaj o realizaciji Programa utroška sredstava iz Budžeta Općine Kakanj za podsticaj razvoja, poduzetništva i obrta za 2018. godinu, te isti dostaviti Općinskom vijeću na razmatranje i usvajanje.

**PREDSJEDAVAJUĆI
OPĆINSKOG VIJEĆA**

Slaven Katičić